

摘藻堂四庫全書薈要

經部

欽定四庫全書薈要卷二千六百五十八

經部

大學衍義補卷四十八

明 邱濬 撰

治國平天下之要

明禮樂

郡國之禮

周禮州長

二千五百家為一州

各掌其州之教治政令之法

則正也

月

建子之月

之吉各屬

合也

其州之民而讀法以攷其德行道

藝而勸之以糾其過惡而戒之若以歲時祭祀州社則屬其民而讀法亦如之歲終則會其州之政令正歲建寅之則讀教法如初

黨正

五百家為一黨

各掌其黨之政令教治及四時之孟月吉

日則屬民而讀邦法以糾戒之春秋祭禘

謂祭水旱之類

亦如

之

族師

百家為族

各掌其族之戒令政事月吉則屬民而讀邦

法

閭胥

二十五家為閭

各掌其閭之徵令聚衆庶既比則讀法

朱熹曰周禮屬民讀法今有司能一歲三四舉行之其于風化不為無助

臣按成周盛時制為教治政令之法既已行之于朝廷國都而又推之于州黨族閭焉二千五百家為州州有長五百家為黨黨有正百家為族族有師二十五家為閭閭有胥皆以歲時屬其民而讀邦法每歲之常州長則以正月及正歲是一歲而

再讀也黨正則以四時之孟月是一歲而四讀也
族師則每月而一舉行焉是一歲而十二讀也他
如州長之祭祀州社黨正之春秋祭滎族師之春
秋祭酺其非時而讀法者又不止一也是以當時
之民耳目之所聞見者莫非先王之教典朝廷之
政治官府之禁令是其出作入息皆在乎禮法之
中出口入耳無非勸戒之語欲為善而知所勸欲
為惡而有所懲此所以比屋可封而鄉無不善之

俗而世多良材也歟我聖祖作為教民榜文頒布天下閭里御製大誥三編頒布天下學校蓋即周官所謂教治政令之法也

鄉師之職正歲稽其鄉器

考其良窳

比五家為比

比五家平聲下同

吉凶二

服閭

二十家

共祭器族

百家

共喪器黨

五百家

共射器州

二千五百

家

共賓器鄉

萬二千五百家

共吉凶禮樂之器

鄭氏曰吉服者祭服也凶服者弔服也比長主集為之祭器者簠簋鼎俎之屬閭胥主集為之喪器者素

俎豆之屬族師主集為之此三者民所以相共也
射器者弓矢楅中之屬黨正主集為之賓器者尊俎
笙瑟之屬州長主集為之吉器若閭之祭器也凶器
若族之喪器也禮樂之器若州長賓射之器鄉大夫
集此四者為州黨族閭有故而不共也此鄉器者旁
使相共則民無廢事上下相補則禮行而教成矣

臣按成周盛時以禮樂為治而行禮樂者必有器
具非特朝廷之上為然而凡比閭族黨之間皆有

其器以為行禮之具當世之民耳聞而目見無非
禮樂之事此所以比屋可封而成粹美之俗也後
世非獨民不識禮樂而名為士大夫者亦惟口誦
其言而不知其所以為禮樂之器具何如也風俗
之不如古又何怪哉

以上讀
法供器

禮記曰鄉飲酒之義主人拜迎賓于庠門之外入三揖
而后至階三讓而后升所以致尊讓也盥洗揚觶所以
致潔也拜至拜洗拜受拜送拜既所以致敬也尊讓潔

敬也者君子之所以相接也君子尊讓則不爭潔敬則不慢不慢不爭則遠于鬪辨矣不鬪辨則無暴亂之禍矣

呂大臨曰鄉飲酒者鄉人以時會聚飲酒之禮也因飲酒而射則謂之鄉射鄭氏謂三年大比興賢者能者鄉老及鄉大夫率其吏與其衆以禮賓之則是禮也三年乃一行諸侯之卿大夫貢士于其君蓋亦如此黨正每歲國索鬼神而祭祀則以禮屬民而飲酒

于序則黨正因蜡飲酒亦此禮

臣按先儒謂鄉飲有四一則三年賓興賢能二則鄉大夫飲國中賢者三則州長習射四則黨正蜡祭今世所行者惟存一鄉大夫飲國中賢者爾他如所謂州長習射黨正蜡祭世不復講而三年賓興賢能其宴會雖謂為鹿鳴而亦不以鄉飲為名焉夫鄉飲之名始于成周漢唐以來亦間行之然無定制我太祖皇帝得國之初即詔天下府州縣

每歲再行永為定制伏讀御製大誥有云鄉飲酒
禮不過申明古先哲王教令而已所以鄉飲酒禮
叙長幼論賢良別姦頑異罪人其坐席間年高有
德者居于上高年淳篤者竝之以次序齒而列其
有曾違條犯法之人列于外坐同類者成席不許
干于良善之席主者若不分別致使貴賤混淆察
知或坐中人發覺主者坐以違制姦頑不由其主
紊亂正席全家移出化外嗚呼斯禮古先哲王之

制安良民于宇內亘古至今興者鄉里安鄰里和
長幼序無窮之樂大哉王言所謂從者昌否者亡
其垂世警俗之意深矣傳曰禮之教化也微其止
邪于未形使民日遷善遠罪而不自知也其此意
歟

故聖人制之以道鄉人士君子尊于房戶之間賓主共
之也尊有玄酒以水為之貴其質也羞出自東房主人共之

也洗當東榮主人之所以自潔而以事賓也

鄭氏曰鄉人謂鄉大夫也士謂州長黨正也君子謂鄉大夫也尊于房戶之間賓主共之者設酒尊于東房之西室戶之東在賓主之間酒雖主人之設而賓亦以之酢主人故云共之也地道尊右設玄酒在西者貴其質素故也

臣按此古人行鄉飲酒禮之一賈公彥所謂又有鄉大夫士飲國中賢者用鄉飲酒者此也由是觀之則是禮非獨尚齒又所以尚賢也而我聖祖之

誥所謂序長幼尚齒也論賢良尚賢也然非特如此而已又因之以別姦頑異罪人一禮之舉衆義備焉嗚呼盛哉

周禮鄉大夫之職三年則大比攷其德行道藝而興賢者能者鄉老及鄉大夫帥其吏與其衆寡以禮禮賓之以鄉飲之禮禮而賓之

吳澂曰古者鄉大夫行鄉飲酒于鄉學以賓禮興賢者能者而升其書于天府擇其最賢者為賓其次為

介此以德選不以齒論

臣按此古人行鄉飲酒禮之二也本朝三年大比一開科兩京十三藩皆有鄉試擢棘之日有司設席以待考試官及中式舉子謂之鹿鳴宴今宜斟酌古制以解首為賓以次為介為三賓為衆賓而以考試官為僎提調官為主監試官為司正執事官及藩臬官僚皆以陪位其中執事人員有營私作弊者列于外坐一如朝廷頒降禮制而行以復

古人賓興賢能之禮

或別設席以勞試官亦可

黨正國索鬼神而祭祀則以禮屬民而飲酒于序以正

齒位

鄭氏曰國索鬼神而祭祀謂歲十二月大蜡之時也
正齒位者鄉飲酒義所謂六十者坐五十者立侍六十者三豆七十者四豆八十者五豆九十者六豆是也
必正之者為民三時務農至此農隙而教之尊長
養老見孝弟之道也

臣按此古人行鄉飲酒禮之三也竊惟今制一歲
凡再行鄉飲酒禮既行之于正月望日又以十月
朔旦行焉歲首之禮宜如常制合養在官在民之
老以正齒位若夫孟冬之月百穀告成農夫終歲
勤苦始得少息請略倣周人蜡祭之禮備牲醴以
索祭鬼神聚民之老者飲以勞之遂禮其年高有
德者以為大賓而以其能帥子弟耕稼者為衆賓
庶合古禮意

射義曰卿大夫士之射也必先行鄉飲酒之禮

賈公彥曰州長因春秋二時以禮會聚其民而行禮于州之序學中先行鄉飲酒為禮而射

臣按此古人行鄉飲酒禮之四是即州長春秋以禮會民而射于州序也臣請于正月望日十月朔日行禮之後即率賓介以下依朝廷原降射禮儀注行射禮于學中庶古禮復行于今日

孔子曰吾觀於鄉而知王道之易易也

吳大臨曰禮之所尊尊其義也其文則擯相習之其義則君子知之修其文達其義然後可以化民成俗也貴賤明隆殺辨和樂而不流弟長而無遺安燕而不亂此五者皆見于飲酒之禮而可以化民成俗故曰吾觀于鄉而知王道之易易也易謂易行易易者甚言其易也

黃幹曰請賓介陳器饌獻賓介獻饌旅酬燕此六者禮之大節也登降辭受禮之文也鼎俎籩豆禮之器

也脯醢脊脅禮之用也此觀禮者所共知也其數易知其義難知也鄉飲教親睦也鄉閭親睦陵犯爭訟之風息矣一飲一食一拜一坐一揖一降無非教也通于義者又非但可以親睦鄉閭而已也天理得人心正無所施而不可也聖人著為禮以教人凡為鄉人者皆知此義焉此成周之世所以人人皆有士君子之行也禮廢樂墜鄉人之群飲者未嘗廢豐飲食侈供張悅聲妓恣驩嗷教侈也誨淫也恣欲也無非

所以敗人心者也後世之士夫曾古之服勤于畎畝者之不若也然則是禮也今世學士大夫有志于古者其可不思所以講明而肄習之歟

臣按孔子此言與所謂聖人制之以道及我聖誥之文是知是禮之在天下誠行王道之要萬世帝王所當舉行而凡有民社之寄者不可徒應故事而不知所以敬慎之也

以上鄉飲酒禮

周禮鄉大夫邊而以鄉射之禮五物

猶事也

詢衆庶一曰

和發而

二曰容

動皆合禮

三曰主皮

不失正鵠

四曰和容

容比於和

五

曰興舞

節比於樂

吳澂曰詢衆庶者問于衆庶而求其人也

臣按此鄉大夫賓興賢能既選而行鄉射之禮以詢衆庶也我聖祖於洪武三年初詔天下開科第三場面試四事其一曰射以觀其中數多寡即此制也

州長春秋以禮會民而射于州序

丘葵曰序者州之學孟子曰序者射也蓋射以序進
且以別其賢否也

臣按三代之後射禮不行也久矣惟晉庾亮曾依
周制以行我聖祖初得天下即令天下府州縣學
訓誨生員每日講讀經書罷于學後設一射圃教
學生習射朔望要試過其有司官閑暇時與學官
一體習射命禮部定圖式儀注凡八則一射式二
樹射鵠三置射位四主射五賞酒六司射七射器

八射職九射位十儀注所謂射器者凡九射職者
凡七至今天下皆立射圃朔望有司躬謁先師及
聽諸生講讀後詣圃行射禮是卽州長會民射于
州序之遺意也

射義曰故射者進退周還必中禮內志正外體直然後
持弓矢審固持弓矢審固然後可以言中此可以觀德
行矣

呂大臨曰禮射者必先比耦故一耦皆有上耦下耦

皆執弓而挾矢其進也當階及階當物及物皆揖其
還也亦如之其行有左右其升降有先後其射皆拾
發其取矢于楅也始進揖當楅揖取矢揖既搢挾揖
還與將進者揖其取矢也有橫弓卻手兼附順羽拾
取之節焉卒射而飲勝者袒決遂執張弓不勝者襲
脫決拾加弛弓升飲相揖如初則進還周旋必中禮
可見矣夫先王制禮豈苟為繁文末節使人難行哉
亦曰以善養人而已蓋君子之于天下必無所不中

節然後成德必力行而後有功其四肢欲安佚也苟
恭敬之心不勝則怠惰傲慢之氣生動容周旋不能
中乎節體雖佚而心亦為之不安安其所不安則手
足不知其所措故放辟邪侈踰分犯上將無所不至
天下之亂自此始矣聖人憂之故常謹于繁文末節
以養人于無所事之時使其習之而不憚煩則不遜
之行亦無自而作至于久而安之則非禮不行無所
徃而非義矣君子敬以直內義以方外所存乎內者

敬則所以形乎外者莊矣内外交修則發乎事者中矣射一藝也容比于禮節比于樂發而不失正鵠是必有樂于義理久于敬恭用志不分之心然後可以得之則其所以得之者其為德可知矣

子曰君子無所爭必也射乎揖讓而升下而飲其爭也君子

朱熹曰揖讓而升者大射之禮耦進三揖而後升堂也下而飲謂射畢揖降以俟衆耦皆降勝者乃揖不

勝者升取觶立飲也言君子恭遜不與人爭惟于射而後有爭然其爭也雍容揖遜乃如此則其爭也君子而非若小人之爭矣

子曰射不主皮為力不同科古之道也

朱熹曰射不主皮鄉射禮文為力不同科孔子解禮之意如此也皮革也布侯而棲革于其中以爲的所謂鵠也科等也古者射以觀德但主于中而不主于貫革蓋以人之力有彊弱不同等也

楊時曰中可以學而能力不可以彊而至

臣按儀禮射有三大射賓射燕射天子諸侯卿大夫皆有之士無大射而有賓射燕射後世禮廢之後而所謂射者惟用之戰陳而用之以為禮節者蓋微矣我聖祖欲以之取士以復古人擇士澤宮之制而不果既而頒其圖式儀注于天下非但以是而教士子而必俾學官與有司習射焉噫方其無事而教之于學校以習其禮遜之容一旦有事

也則以用之于戰陳而無敵于天下矣

以上鄉射禮

周禮大行人主之所以撫邦國諸侯者歲徧存

問其安否

三

歲徧眺

眡其治効

五歲徧省

察其風俗

國語曰周之秩官

秩官周常官篇名

有之曰敵國賓至關尹

官名

以告行理

吏也

以節

以節為信逆也

迎之候人

為導導

卿出郊勞

門尹除

掃除

門宗祝執祀

司里授館司徒具徒

執役者

司空

視塗

道路

司寇詰奸

禁詰奸盜

虞人入材

材木

甸人積薪

用以火

火

師監燎

燎火

水師監濯

滌濯

膳宰致餐

熟食

廩人獻餼

生食

司馬

陳芻養馬工人展車

補傷敗

百官各以物至賓入如歸是故

小大莫不懷愛其貴國之賓至則以班加一等益虔至

于王使則皆官正

長也臨也

事上卿監

視也

之

臣按周禮一書其于諸侯聘問之禮詳備而于王

朝遣使之禮略焉大行人王之所以撫邦國諸侯

無歲無之而不聞其有節送供奉之禮獨于國語

定王使單襄公聘宋楚而道陳道弗而不可行歸

告于王而引周之秩官之語所言皆侯國之禮其

末一語云至于王使皆官止涖事上卿監之則在當時必有其禮周禮立制以訓諸侯惟載其所以相待之禮而其所以奉上者不載焉非不載也敵國之禮尚如此而貴國賓至且以班加一等益虔則天子之使至所加不止于一等而其所以虔敬者益之又益可知也自罷侯置守之後無復邦交之禮所以奉承者惟天子之使爾攷歷代之禮制惟有王朝之禮所謂郡邑之禮泯如也本朝開國

之初定爲洪武禮制出使禮儀凡六條二十年又命禮部官著爲禮儀定式出使禮儀凡三條二十七年又命禮官參用二書爲出使禮儀總二十條開讀遣使一奉使王國二奉使諸司十四蕃國三頒降行人司永爲定制又詔頒迎詔儀注于天下凡朝遣使各處開讀將至所在官僚朝服具龍亭綵輿儀仗鼓樂郊迎使者下馬以詔置于龍亭使者立亭東官吏人等北向行五拜三叩頭禮衆官

及鼓樂前導使者隨行至所司衆官先入東西序

立龍亭至使者立其東西向

如有出使廷臣先贊曰出使官行禮引贊

引出使官于露臺贊唱排班班齊之後四拜使者行五拜三叩頭禮

捧詔授展讀官跪受之開讀衆官跪聽

出使官于露臺東跪

聽

宣讀訖展讀官捧詔授使者復置亭中衆官俯

伏興四拜山呼舞蹈又四拜禮畢衆官詣龍亭前跪長官致辭曰聖躬萬福使者鞠躬答曰聖躬萬福衆官乃退易服見使者行再拜禮臣竊以謂自

古禮文之詳莫備于周禮一書而其中所載朝覲聘問之禮雖詳而于出使一節獨闕而我聖祖創爲之制其詳有如此者蓋王朝之于郡國以地言之則疆域阻遠以分言之則名分懸絕所以達上下之情一遠近之勢以其有使臣之往來詔令之頒布耳其所以迎接而授受者苟簡而粗率非獨無以嚴九重之威命重皇華之使節而下之人亦輕忽而不知所重而播告之修申諭之意或不足

以聳動乎奉承之人而事體或至于墮機會或至

于失亦或有之矣

以上出使及迎詔禮

月令季冬之月命有司大難

與卿同

旁磔

披磔牲體攘除陰氣

出土

牛以送寒氣

陳澍曰月建丑丑爲牛土能生水故特作土牛以畢

送寒氣也

陳祥道曰土勝水牛善耕勝水故可以勝寒氣善耕故可以示農耕之早晚月令季冬之月大難旁磔然

後出土牛則出土牛驅除之終事也既乃告民出五種命農計耦耕事則出土牛又農耕之始事也

後漢祭祀志立春之日迎春于東郊車旗服飾皆青歌青陽舞雲翹之舞

宋志立春前五日並造土牛耕夫犁具于大門之外是日黎明有司為壇以祭先農官吏各具綵杖環擊牛者三所以示勸耕之意

臣按宋景祐所頒土牛經其作土牛以歲之幹色

為首支色為身納音色為腹以立春日幹色為角
耳尾支色為脰納音色為蹄元至元所頒經式牛
色則以立春日為法日幹為頭角耳色支為身色
納音為蹄尾肚色國初襲用元制正統中始用言
者製土牛色復用歲之支幹納音如宋法今制每
歲立春日內而京兆外而藩府州縣先期造土牛
芒人前一日出東郊具鼓樂迎入所司至日行鞭
春禮衆官各執綵鞭環牛者三衆共擊碎之

以上
迎春

禮

馬端臨曰秦漢之後禮之因革不同有古有而今無者如大射聘禮士相見之類是也有古無而今有者如聖節上壽上尊號拜表之類是也

臣按古今異宜禮經有可以義起之文天下之事揆之于義而與義無悖則是禮雖自古先王未之有制而後世之人以義起之而制爲一代之禮不爲過也馬氏著文獻通考獨爲王朝之禮所謂郡

國之禮無有焉其言曰今禮則雖不能無失然而
議禮制度非書生可得與聞也是以亦不復措辭
焉夫書生而與聞議禮制度而為之措辭固不可
若夫述前人之舊詳一代之制亦何不可之有夫
所謂聖節上壽及漢以來賀歲首魏晉以來賀冬
至此雖三代以前所未有然古者列國之于王朝
朝覲會同殷頻之類歲無虛月而今世所行者此
三禮而已三禮也在朝文武百官至日具表拜賀

而天下親藩邊將藩憲府州衛所五品以上官司
先期遣官奉表稱賀至期前一日習儀于寺觀至
日于所在官廳行慶賀禮其儀注大略如朝儀但
祝贊之辭不同及正至不用傳制耳茲三禮者今
日朝儀以為大禮是非獨以寓臣子忠愛之誠亦
以昭示華夷使人心之趨向者益以恭萬方之尊
戴者益以固是雖古無而今有禮所謂義起者政
此類也聖人復起臣知其決不易也矣今其禮儀

具見洪武禮制但今天下進表衙門先期進表已
行十二拜山呼舞蹈禮至日惟行五拜三叩頭禮
而五品以下衙門則行全禮臣竊以臣子奉上之
禮宜隆而不宜殺當三大朝賀之日闔郡官吏儒
生軍民人等畢至必先演習其儀而後行禮至日
其禮乃簡略如此似乎不稱請一體俱行全禮為

宜

以上遙
賀之禮

朱熹曰禮之施于朝廷者州縣士民無以與知為也而

盡頒之則傳者苦其多習者患其博而莫能窮也故莫
若取自州縣官民所應用者參以近制別加纂次號曰
臣民禮略鋟板模印而頒行之州縣各為三通一通于
守令廳事一通于學一通于名山寺觀皆櫝藏之守視
司察體如詔書而民庶所用則又使州縣自鋟之板正
歲則模而揭之市井村落使通知之則可以永久矣
又曰禮書既頒則又當使州縣擇士人之篤厚好禮者
講誦其說習其頒禮州縣各為若干人廩之于官名曰

治禮每將舉事則使教焉又詔監司如提學事者察其奉行不如法者舉懲治之

臣按朱氏此言可以施行于今請令禮官將洪武年間頒降孝慈錄諸司職掌洪武禮制禮儀定式及永樂中頒降文公家禮等書逐一參考凡繫天下郡縣家鄉臣民所當行之禮勅翰林儒臣簡節刪潤著為一書印行天下使之遵守如朱熹所議者又于學校村社選人習學演行而命州縣正官

學校教職專一管領而提督學校憲臣勅書中以此載入俾其按部提督察其勤惰以爲勸懲是誠化民成俗之要務爲治之道莫先于此伏惟聖明留意則朱熹之議不行于昔而行于今天下臣民不勝幸幸

周禮小行人若國札

病疾爲札喪札而死

則令賻

以禮傳之謂之賻

補

助其不足

之若國凶

穀不熟

荒

凶甚爲荒

則令賙

以利周之

委

以聚與之

若國師

軍旅役

則令搞

也

禮

會衆財與之

之若國有

福事則

令慶賀之若國有禍哉則令哀弔之凡此五物者治其
事故

臣按天子之于侯國有札喪則令賻補有凶荒則
令賙委是即大宗伯以喪禮哀死亡以荒禮哀凶
札也有師役則令犒餼是即大宗伯以餼禮哀圍
敗以卹禮哀寇亂也福事則令慶賀禍哉則令哀
弔豈非大宗伯以賀慶之禮親異姓之國以弔禮
哀禍哉者乎臣于明禮樂下著郡國之禮前此皆

郡國奉行于上之禮此則朝廷所以施行于下之禮也成周盛王所以周卹保愛其臣民者不以勢而以理不以分而以禮如此視後世以牛羊草芥待其民者有間矣嗚呼仁矣哉

及其萬民之利害為一書其禮俗政事教治刑禁之逆順為一書其悖逆暴亂作慝猶犯令者為一書其札喪凶荒厄貧為一書其康樂和親安平為一書凡此物者每國辨異之以反命于王以周知天下之故

吳澂曰萬民之利害謂若禁革則某事為民便某事為民害也逆順者遵王法為順背王法為逆也悖逆至犯令謂人之為惡者也札喪凶荒厄貧謂人之不幸而遇災者也康樂和親安平謂人之為善而又有福慶者也以此五者詢問諸國別而書之使王得以周知若民利興政俗美惡人少裁禍弭福慶集則治可知也反是則不治矣

鄭鐸曰職方掌天下之圖以周知其利害其知也以

圖此則載之以書按書所以知其事也禮俗也政事也教治也刑禁也諸侯之所行者或有逆順從違不為一書無以知其叛服之事悖逆也暴亂也作慝也犯令也過惡之已著也不為一書無以知其罪惡之輕重猶是曾犯令矣猶不改而猶犯令焉札喪也凶荒也厄貧也諸侯所遭之故不為一書無以知遠民之憂康樂謂民之安樂和親謂僚采之交歡安平謂其國之寧靜不為一書無以知侯國之治

臣按三代封建之制行而天子所以相與爲治者
侯國也罷侯置守之後則藩服州郡實視古諸侯
焉然古之侯國不過數十今之郡縣多至千百其
土宇之分割疆域之遼隔官吏之繁多其執未易
以合其情未易以通視古爲尤難也在成周之時
設為小行人之職巡行而辨異之有不能徧究而
悉舉故為之書以述其事凡有五焉蓋先王以天
下為一家中國為一人則小行人以此五物者巡

行天下每國而辨異之各為一書以反命于王以
周知天下之故則人君居九重之上不下几席而
一繙閱之頃天下之大四海之廣萬民之禮俗皆
在乎心目之間矣臣願乞敕兩畿十三藩巡撫大
臣及方面府州各為一書備載郡邑禮俗政事教
治刑禁當行切要之務以備乙夜之覽遇有急切
之事按書以求其故其於國政未必無補

以上郡國之禮臣按郡國之禮不止於此而

所載止此者祀典則具秩祭祀下學校則具
崇教化下

以上郡國之禮



大學衍義補卷四十八

欽定四庫全書

覆校官編修臣張秉愚

校對官檢討臣王福清

謄錄監生臣朱烺

欽定四庫全書薈要

經部

大學衍義補卷四十九

五十九

詳校官編修臣程嘉謨



欽定四庫全書薈要卷二千六百五十九

經部

大學衍義補卷四十九

明 邱濬 撰

治國平天下之要

明禮樂

家鄉之禮

上之上

禮記王制六禮冠昏喪祭鄉相見

吳澂曰冠昏喪祭四者家之禮也鄉相見二者鄉之

禮也儀禮有士冠禮士昏禮士喪禮士之祭有特牲饋食禮鄉有鄉飲酒禮相見有士相見禮

論語子曰慎終追遠民德歸厚矣

朱熹曰慎終者喪盡其禮追遠者祭盡其誠民德歸厚謂下民化之其德亦歸於厚蓋終者人之所易忽也而能謹之遠者人之所易忘也而能追之厚之道也故以此自爲則已之德厚下民化之則其德亦歸於厚也

蘇軾曰忽略於喪祭則背死忘生者衆而俗薄矣
子曰生事之以禮死葬之以禮祭之以禮

朱熹曰生事葬祭事親之始終具矣禮即理之節文
也人之事親自始至終一於禮而不苟其尊親也至
矣

胡寅曰人之欲孝其親心雖無窮而分則有限得爲
而不爲與不得爲而爲之均於不孝所謂以禮者爲
其所得爲者而已矣

文中子曰冠禮廢天下無成人矣昏禮廢天下無家道矣喪禮廢天下遺其親矣祭禮廢天下忘其祖矣

朱熹曰禮有本有文自其施於家者言之則名分之守愛敬之實其本也冠昏喪祭儀章度數者其文也其本者有家日用之常體固不可以一日而不修其文又皆所以紀綱人道之始終雖其行之有時施之有所然非講之素明習之素熟則其臨事之際亦無以合宜而應節是亦不可一日而不講且習焉者也

臣按禮曰人有禮則安無禮則危是則禮之在天
下非徒有是儀章度數以爲觀美而已也風俗之
隆汙世道之理亂人家之成敗皆繫於是禮焉禮
無乎而不在要必人人行是禮家家行是禮積家
以爲郡國積郡國以爲天下無一處而無是禮無
一事而不由是禮是則所謂三代比屋可封之俗
矣

又曰三代之際禮經備矣然其存於今者宮廬器服之

制出入起居之節皆已不宜於世世之君子雖欲酌以古今之變更爲一時之法然亦或詳或略無所折衷至或遺其本而務其末緩於實而急於用自有志好禮之士猶或不能舉其要而困於貧窶者尤患其終不能有以及於禮也是以嘗獨究觀古今之籍因其大體之不可變者而少加損益於其間以爲一家之書大抵謹名分崇愛敬以爲之本至其施行之際則又略浮文趨本實以竊自附於孔子從先進之遺意庶幾古人所以脩

身齊家之道慎終追遠之心猶可以復見而於國家所以崇化道民之意亦或有小補云

臣按宋儒朱熹本儀禮及程張司馬氏諸家禮書作為家禮一書酌古準今實為簡易可行太宗皇帝命儒臣修性理大全書已備載其書今士大夫家亦徃徃有舉行者乞敕禮部詳定頒行天下俾諸道督學憲臣兼提其要行下府州縣教官每旬一次帥師生演習其儀并令鄉村社學教讀者專

習其事遇民間有吉凶等事按儀而行如此則天下之人家有其書人習其禮朱熹謂修身齊家之道慎終追遠之心可以復見然不見於熹之時而見於今世又謂國家崇化道民之意亦有所補然不補於宋朝而補於今朝矣臣嘗將家禮彙括以爲儀節頗簡易可行今士大夫亦有依而行者儻有可采乞發下天下郡縣不爲無補以上總論人家當行之禮

內則曰后王命冢宰降德于衆兆民

呂祖謙曰內則一篇首言后王命冢宰降德于衆兆民蓋三代所以教天下者皆以是自秦漢以來外風俗而論政事不復以人家事爲問矣

吳澂曰天子爲天下之君師治而教之而冢宰六卿之長佐天子者也降下也德得也謂以人所同得於天之理立爲教法命冢宰降下其德教於衆兆民俾效而法之也所謂德教如下文所載是也

臣按三代帝王本乎德以為教非但行之於宮闈朝廷官府而又制為禮法命大臣以降下於天下使凡億兆之衆莫不知所以法則而遵行焉蓋天下者家之積也積億萬人家以成天下必家家齊然後天下之治成蓋人君之平治天下譬如構萬間之廣廈焉苟其間闕其一椽一桷則其規制亦非全者矣

子事父母鷄初鳴咸盥漱

洗

漱

漱

櫛

梳

縱

結

筓

簪

總

髮

束

髮

婦事舅姑如事父母以適父母舅姑之所及所下氣

怡聲問衣燠寒疾痛苛

齊

癢而敬抑

按

搔摩也

之出入則

或先或後而敬扶持之進盟少者奉槃長者奉水請沃

盥盥卒授巾問所欲而敬進之柔色以溫之饘

厚薄粥醢粥

酒醴芼羹

以菜雜肉

菽麥蕡

大

稻黍稷唯所欲棗栗飴密

以甘之薑荳粉榆芡

音問

新

薨滫

久

瀹

滑

以滑之脂膏

以膏之父母舅姑必嘗之而後退

司馬光曰父母舅姑起子供藥物具晨羞尊長舉箸

子婦乃各退就食

臣按人子事親固當盡其孝尤當致其敬不徒以下氣怡聲柔色為孝也而凡其抑搔也扶持也問所欲也皆必以敬焉孝而不敬非孝矣

在父母舅姑之所有命之應唯敬對進退周旋慎齊升降出入揖遊不敢噦噦逆出聲噫噫氣塞出聲嚏嚏嗽聲咳咳氣乏則欠伸伸體疲

則跛倚倚依物為倚睇視睇視順視也不敢唾口津也涕涕鼻液也寒不

敢襲重衣癢不敢搔不有敬事不敢袒裼不涉謂涉水不擻

揭裳褰衣衾不見裏

方慤曰噦噦噦咳則聲爲不恭欠伸跛倚則形爲不恭寒不敢襲瘡不敢搔不敢適已之便也

子婦孝者敬者父母舅姑之命勿逆勿怠

陳澹曰子而孝父母必愛之婦而敬舅姑必愛之然猶恐其恃愛而於命或有所違也故以勿逆勿怠爲戒

子謂為人子者婦子之妻無私貨無私畜無私器不敢私假不

敢私與

鄭氏曰家事統於尊也

吳澂曰貨謂所儲資財之物畜謂所養畜牲之物器謂飲食等所用之物假謂以物借人與謂以物遺人

也

以上兼言子婦事
父母舅姑之禮

曲禮曰凡爲人子之禮冬溫而夏清昏定而晨省

司馬光曰父母舅姑將寢則安置而退

呂祖謙曰一歲冬夏有寒暑之變一日晨昏有晦明

之變冬溫如古人置密室之類夏清如古人扇枕之類

夫爲人子者出必告反必面所遊必有常所習必有業
恒言不稱老

陳澠曰出則告違反則告歸遊有常身不他往也習
有業心不他用也平常言語之間自以老稱則尊同
於父母而父母爲過於老矣

食饗不爲粢

陳澔曰食棨如奉親延客及祭祀之類皆是不爲槩量順親之心而不敢自爲限節也

聽於無聲視於無形

鄭氏曰雖聽不聞父母之聲雖視不見父母之形然心常想像似見形聞聲謂將有教使已然

父母存不有私財

戴溪曰粒粟縷絲以上皆親之物豈敢私有

為人子者父母存冠衣不純素

鄭氏曰純緣素為有喪象也

父子不同席

吳澂曰古者一席坐四人言父子偶共一處而坐雖止一人必各坐一席蓋以父昭子穆父穆子昭尊卑不同故也

父母有疾冠者不櫛行不翔言不惰琴瑟不御食肉不至變味飲酒不至變貌笑不至矧齒本也怒不至詈疾止

復故

司馬光曰凡父母舅姑有疾子婦無故不離側親調
嘗藥餌以供之父母有疾子色不滿容不戲笑不宴
遊捨置餘事專以迎醫檢方以求藥為務

子於父母則自名也

呂大臨曰子之名父母所命敬親之命不敢有他稱
也

親有疾飲藥子先嘗之

顏之推曰父母有疾子拜醫以求藥蓋以醫者親之

存亡所繫豈可傲忽哉

子之事親也諫而不聽則號泣而隨之

孔穎達曰父子天性理不可逃雖不從當號泣而隨之與有悟而改

內則曰父母有過下氣怡色柔聲以諫諫若不入起敬起孝說則復諫不說與其得罪於鄉黨州閭寧孰諫父母怒不說而撻之流血不敢疾怨起敬起孝

孔穎達曰諫而使父母不說其罪輕畏懼不諫使父

母得罪於鄉黨州閭其罪重二者之間寧用熟諫謂純熟殷勤若物之成熟然

吳澂曰復諫再諫也熟諫者至三至四而猶未已如火之熟物必期變化生物之堅硬者至於軟熟也

臣按內則此章之旨朱子引之以解論語事父母幾諫章謂二章之言相表裏解幾為微微諫謂下氣怡色柔聲以諫漸漸細密不須峻暴強加闡截也臣竊以謂朱子之意固是但於幾字之訓似不

甚親切若以為幾微之幾則孝子之於親視於無
形聽於無聲方其幾微萌露之初即探其情志意
嚮之所在隨事而致其察先事而為之防消之於
未然遏之於將然則用力比於熟諫為省矣噫孝
子之於親過未形則幾諫過已形則熟諫致其親
於無過之地則非徒養其志而又有以成其德矣
由是言之二章之意非但相表裏蓋相始終焉

凡父母在子雖老不坐

吳澂曰家人有嚴君焉父母之謂也有尊者在上故子之年雖老亦不敢坐

王藻曰親在行禮於人稱父人或賜之則稱父拜之方慤曰不敢私交不敢私受故也

父命呼唯而不諾手執業則投之食在口則吐之走而不趨

方慤曰既曰命又曰呼者命之以事呼之以來也唯諾皆應也而唯之應速於諾走趨皆步也而走之步

速於趨

親老出不易方復不過時親瘠

病也

色容不盛此孝子之

疏節

謂常行疏略之禮非大節也

也

方慤曰孝子之事親豈必老而後如是耶蓋以親老者尤不可不知此故也

陳澔曰易方恐召已而莫知所在過時則恐失期而貽親之憂

臣按為人子者當父母生存之日兢兢愛日而盡

其當然之理是則所謂孝也易曰有父子而後有君臣傳曰事親孝故忠可移於君人人盡為子之道則治平之基在此矣

論語曰父母在不遠遊遊必有方

朱熹曰遠遊則去親遠而為日久定省曠而音問疏不惟已之思親不置亦恐親之念我不忘也遊必有方如已告云之東即不敢更適西欲親必知已之所在而無憂召已則必至而無失也

范祖禹曰子能以父母之心為心則孝矣

臣按先儒謂朱子十四歲喪父事母盡孝所以發明此章曲盡孝子之心蓋非身歷心驗之不能精微曲折如此人子之事親者宜身體之

以上人子生事父母

之禮

內則曰凡婦不命適私室不敢逗

鄭氏曰婦侍舅姑者也

方慤曰私室婦室也其視舅姑之室若公所

婦將有事大小必請於舅姑

鄭玄曰家事統於尊也

婦或賜之飲食衣服布帛則受而獻諸舅姑舅姑受之則喜若反賜之則辭不得命藏以待乏

吳澂曰為人婦者或有私親兄弟賜之飲食衣服布帛等物既受之後持以獻之舅姑舅姑肯受所獻則喜若舅姑不受而以所獻還賜其婦則必辭而不敢受若不許辭亦不敢用藏之以待舅姑乏用之時與

之用也

舅姑使冢婦毋怠不友

當作敢

無禮於介婦

劉彝曰舅姑以事命冢婦則冢婦當自任其勞不可憚其勞而怨介婦不助已遂不愛敬之也

舅姑若使介婦毋敢敵耦於冢婦不敢並行不敢並命不敢並坐

方慤曰兩相抗為敵兩相合為耦言使之勞逸不敢與冢婦均也不敢並行並坐亦毋敢敵耦之事

冢婦所祭祀賓客每事必請於姑介婦請於冢婦

輔廣曰婦傳家事矣禮之大者亦必請於姑

臣按子於父母天性也而婦於舅姑雖非天性之親然緣夫而以父母之道事之所以助成其孝亦天性之自然也故內則后王降教于民徃徃以子婦並言子於父母婦於舅姑其稱謂雖有異名而其所以事之之道則一而已故臣於家鄉之禮既兼載子婦事父母舅姑之禮又分載子事父母婦

事舅姑而於婦禮牽連及其所以處姒娣者

以上言婦

事舅姑及處
姒娣之禮

曲禮曰見父之執

父之友也

不謂之進不敢進不謂之退不

敢退不問不敢對此孝子之行也

方慤曰愛親者不敢惡於人敬親者不敢慢於人見

父之執於進退之節有所不敢則一舉足不敢忘親

可知於對問之際有所不敢則一出言不敢忘親可

知

年長以倍則父事之十年以長則兄事之五年以長則

肩隨

並行而
差過

之羣居五人則長者必異席

陳澔曰此泛言長幼之序非謂親者

邵淵曰年倍於我事以父禮長我十年事以兄禮長

我五年差肩隨之至於羣居五人則又異長者之席
其於人也庸敢慢乎以此事親愛敬之道盡矣

長者賜少者賤者不敢辭

陳澔曰辭而後受賓主平交之禮非少賤事尊貴之

道

少儀曰尊長於已踰等不敢問其年燕見不將命遇於道見則面不請所之不畫地手無容不扇也寢則坐跪也而將命

陳澔曰踰等祖與父之行也不敢問年嫌若序齒也燕見不將命謂燕私來見不使擯者傳命非賓主之禮也遇尊長於道見已則面見之不見則隱避不欲煩動之也不請所之不問其所往也無故而畫地亦

為不敬手容恭若舉手以為容亦為不恭時雖暑熱
不得揮扇當尊者寢臥之時而傳命必跪而言之不
可直立以臨之也

王制曰父之齒

年與父等

隨行

從其後

兄之齒

年與兄等

鴈行

並行差退

朋友不相踰

並行而齊

輕任并

已獨任之

重任分

析而二之

班白者不

提挈君子耆老不徒行

無乘而行

庶人耆老不徒食

無羞而食

劉彝曰帝王之為治也不出人倫天下之人入於五

品爾故其天下外薄四海行路之人皆服教化父之

齒隨行父子之教著於道路矣兄之齒鴈行兄弟之
教著於道路矣朋友不相踰禮義之教著於道路矣
輕任并重任分任恤之行著於道路矣班白不提挈
孝友之行著於道路矣故君子耆老不徒行庶人耆
老不徒食君子小人之為子弟者莫不知尊德而養
老

孟子曰徐行後長者謂之弟疾行先長者謂之不弟

臣按此古者少事長之禮所謂長者非但吾之同

氣凡年齒加於已者皆長也孟子有言人人親其親長其長而天下平為治者誠能立為教條布之民間使其必遵之而行否則治其罪積之以歲月而治平之緒可成矣

以上少事長之禮

易家人初九閑有家悔亡象曰閑有家志未變也

程頤曰初家道之始也閑謂防閑法度也治其有家之始能以法度為之防閑則不至於悔矣苟不閑之以法度則人情流放必至於有悔失長幼之序亂男

女之別傷恩義害倫理无所不至能以法度閑之於始則无是矣

臣按程氏所謂閑之之法度是即禮也先儒謂禮始於謹夫婦為宮室辨內外男位乎外女位乎內男不入女不出所以閑有家也所以謹始也吁謹其始於其男女心志未變動之初則豈復有傷恩敗倫之事哉

曲禮曰男女不雜坐不同梳

音枷置衣服移枷之具

不同巾

浼潔者

櫛

理髮者

不親受

鄭氏曰皆為重別防淫

陳澔曰此四者所以遠私褻之嫌

外言不入於梱

門限也

內言不出於梱

孔穎達曰男職在官政女職在織紝各有限域不得濫預

女子許嫁纓非有大故不入其門姑姊妹女子子已嫁而反兄弟弗與同席而坐弗與同器而食

陳澔曰許嫁則繫以纓示有所繫屬也此與幼所佩香纓不同

劉彝曰家人內政不嚴以防之於細微之初不剛以正之於未然之始則其悔咎不可追矣易曰閑有家志未變也男女之志既為情邪之所變閑禁雖嚴求其無咎而咎可無哉故夫婦未七十雖同藏未有可嫌也聖人制禮必爾者以無嫌正有嫌也用有情之難正無情之易也而況於男女未有室家哉女子許

嫁纓所以繫屬其心以著誠於夫氏起其孝義也既許嫁則有姆教之處於梱門之別室男子非有疾憂之故不入其門也

男女異長

鄭氏曰男女各自為伯季也

內則曰男不言內女不言外非祭非喪不相授器其相授則女受以篚其無篚則皆坐跪也奠之而後取之

陳澧曰男正位乎外不當於外而言內庭之事女正

位乎內不當於內而言相外之事惟喪祭二事乃得
以器相授受者以祭為嚴肅之地喪當急遽之時乃
無他嫌也非此二者則女必執篚使授者置之篚中
也授者跪而置諸地則受者亦就地而跪以取之也
外內不共井不共湔浴室浴不通寢席不通乞假男女不
通衣裳內言不出外言不入男子入內不嘯不指夜行
以燭無燭則止女子出門必擁猶障也蔽其面夜行以燭
無燭則止道路男子由右女子由左

劉彝曰外內不共井嫌同汲也不共湑浴嫌相褻也
不通寢席嫌相親也不通乞假嫌往來也不通衣裳
嫌淆雜也內言不出惡交於外也外言不入惡交於
內也禮當入內嘯則涉乎異也指則涉乎覘也有燭
則行夜有不可得而已也無燭則止行則涉於不明
也道路之法其右以行男子其左以行女子古之道
也

禮始於謹夫婦為宮室辨外內男子居外女子居內深

宮固門男不入女不出

陳澔曰夫婦為人倫之始不謹則亂其倫類

方慤曰天下之本在國國之本在家故禮始於謹夫婦謹夫婦故為宮室以居之辨外內以防之男子居外女子居內陰陽之分也深宮則外人不得而入固門則强者不得而啟

春秋左傳君子曰婦人送迎不出門見兄弟不踰閭

臣按易曰有天地然後有萬物有萬物然後有男

女有男女然後有夫婦蓋太極動而生陽靜而生陰陰陽之氣凝而成人乾道成男坤道成女男陽而女陰男陽而配合女之陰則為夫婦由是而生父子由是而成君臣由是而敘為尊卑上下親疏之分此禮義所由以錯也是以人君為治必以正家為本而家之所以正者統系明內外辨秩然有其禮也禮始於謹夫婦夫婦之謹在於正男女之位而分別之人君既正身脩德以閑其有家又必

命官惇典庸禮以敷德教於天下使天下之人曉
然知大防之所在男盡男之禮女盡女之禮各夫
其夫各婦其婦以是成孝敬厚人倫美教化移風
俗則治平之基於是乎立矣三代之盛率循是道
漢唐以來治雜於伯甚而以猺徼自處而不知其
非宋世雖稱尚文然藩服郡邑皆置營妓而名為
士大夫者亦蓄歌姬時或出以娛賓而人家所謂
養娘者又皆立契典雇其風漸流於猺徼五者之

倫斃盡而男女一倫尤甚我朝承其後痛加革禁
立為官吏宿娼之律士夫一有犯焉終身不齒宋
朝視我有媿多矣昔漢承秦人苛刻之後一切反
其所為然路溫舒猶謂秦有十失其一尚存如今
之弊政汙習固已汎掃無餘矣然猶不免有一之
尚存者男女之無別也今燕趙齊晉之域古所謂
中州也自古聖帝明王大賢君子過化存神之地
禮義廉耻所自出也而今閭閻之下貧下之家內

外尚無限隔乃至男女同器而食夫婦以名相呼
翁婦嫂叔之不相迴避繼父繼母之子女相為昏
配諸如此類者尚或有之乞敕有司痛加禁約一
洗媼褻之餘習以昭盛代之文明毋使片翳寸類
以為大朝之玷

以上人家男
女有別之禮

斯干之詩曰乃生男子載寢之牀載衣之裳載弄之璋

半圭也

其泣嗶嗶

大聲也

朱熹曰寢之於牀尊之也衣之以裳服之盛也弄之

以璋尚其德也

又曰乃生女子載寢之地載衣之裼

也祿

載弄之瓦

絜無

非無儀

善也

唯酒食是議無父母詒罹

憂也

朱熹曰寢之於地卑之也衣之以祿即其用而無加

也弄之以瓦習其所有事也有非非婦人也有善非

婦人也蓋女子以順為正無非足矣有善則亦非其

吉祥可願之事也唯酒食是議而無遺父母之憂則

可矣

內則曰子生男子設弧也於門左女子設帨也佩巾於門

右三日始負抱子男射女否

方慤曰設弧於門左左者天道所尊設帨於門右右者地道所尊必曰設者方男女之生其於弧帨有可用之道而未能有用之實也古之人重男女之生又重男女之別非特見於弧帨而已男則寢於牀之尊女則寢於地之卑其衣之也男以畫服之裳女以夜服之裼其弄之也男以所有事之璋女以所有事之

尾

凡接子擇日庶人特豚士特豕大夫少牢其非冢子則皆降一等

鄭氏曰凡接子雖三日之內尊卑必皆選其吉焉
輔廣曰父子之氣未嘗不相接也生三日而又以禮接之於是為至

吳澂曰庶人長子止用特豚禮窮於此無復可降故庶子亦用特

臣按今世人家生子三日而會親姻亦古人接子之意

異為孺子室於宮中擇於諸母與可者必求其寬裕慈惠溫良恭敬慎而寡言者使為子師其次為慈母其次為保母皆居子室他人無事不往

大夫之子有食母

乳母也

士之妻自養其子

鄭氏曰異為孺子室者特埽一處以處之諸母衆安也子師教以善道者慈母知其嗜欲者保母安其居

處者士妻食乳之而已他人無事不往為兒精意微弱將驚動也

孔穎達曰此文雖據諸侯其實亦兼大夫士但士不具三母爾

司馬光曰凡子始生必為之求乳母必擇良家婦人稍溫謹者

方慤曰雖非諸母而其德如下所言可以為師者亦擇之故曰與可者

三月之末擇日剪髮為髻

音

男角

夾肉留兩髻

女羈

頂上留三髻

否則男左女右是日也妻以子見於父父執子之右手

咳

父作咳聲

而名之

咳小兒笑聲謂父作咳聲而名之

輔廣曰男女初生羈角左右其辨也如此則知男女之別無非自然之理豈特以末流之害然後制禮以別之耶

凡名子不以日月不以國

國號

不以隱疾大夫士之子不

敢與世子同名

鄭氏曰此在常語之中為後難諱也

王子墨曰名子父之責也命之者所以示之教也

陳澧曰常語易及則避諱為難故名子者不之用

臣按禮謂大夫士之子不敢與世子同名則夫祖宗之廟諱尤當謹避可知矣為臣子者不可諉以二名不偏諱而故犯之也

左傳桓公六年申繻曰名有五有信有義有象有假有

類以名生為信

若唐叔虞魯公子友

以德命為義

若文王名昌武王名發

以

類命為象

若孔子首象尼丘

取於物為假

若伯魚生有饋之魚名曰鯉

取於

父為類

若子同生有與父同者

不以國不以官不以山川不以隱

疾不以畜牲不以器幣

臣按禮所禁名字者止於不以國不以隱疾而申
繻則於國隱疾之外則又加以不以官不以山川
不以畜牲不以器幣而終之曰周人以諱事神名
終將諱之蓋尤嚴於祭享之時恐名有犯於官則
官職為之廢有犯於山川則主祀為之廢與夫犯

於畜牲器幣則行禮讀祝之時難於避諱也

家禮曰主人生嫡長子則滿月而見主人立於香卓之前告曰某之婦某氏以某月某日生子名某敢見告畢立於香卓東南西向主婦抱子進立於兩階之間再拜主人乃降復位

臣按此古者人家生子之禮臣嘗櫟括文公家禮以為儀注前一日齋宿其日夙興陳設如常儀主人以下各具盛服詣祠堂前男列於左女列於右

世為一列各盥洗啟櫝訖主人詣香案前焚香酌
酒再拜以降神衆叅神行四拜禮主人斟酒主婦
點茶訖主人詭告辭云云俯伏興主婦抱子立兩
階間四拜然後衆辭神行四拜禮禮畢奉主入櫝
生長子則用此儀次子則稍殺之

以上人家
生子之禮

以上家鄉之禮上之上

大學衍義補卷四十九

欽定四庫全書薈要卷二千六百六十

經部

大學衍義補卷五十

明 邱濬 撰

治國平天下之要

明禮樂

家鄉之禮

上之中

內則曰子能食食

飯也

教以右手能言男唯女俞

然也

六年

六歲也

教之數

一十萬之數

與方名

東西南北四方

七年

七歲

男女不

同席不共食八年

八歲

出入門戶及即席飲食必後長者

行坐皆居長者之後

始教之讓

後長者便是讓

九年

九歲

教之數日

朔望與十十十

二支也

十年

十歲

出就外傳居

謂晝所處

宿

謂夜所息

于外學書

謂六書

計

謂九數

禮帥初

凡禮皆循其初不許更變

朝夕學幼儀

學為人少者之儀

請

肄簡

謂書篇數

諒

謂言語信實請肄者請于長者而習學之

顏之推曰教子嬰孩在謹其始子之初生也不可

使之知尊卑長幼之禮若侮詈父母毆擊兄弟父母

不加訶禁反笑而獎之彼既不辨好惡遂謂當然及

其既長習已成性乃怒而禁之不可復制殘忍悖逆
無所不至此蓋父母無深識遠慮不能防微杜漸溺
於小慈養成其惡故也

方慤曰出入門戶欲其行之讓即席欲其坐之讓飲
食則欲其食之讓也

臣按內則所言教子之法自能食能言始其敎年
自六年以至於七十而後止而此所采止於十歲
者陸氏曰十年以後有學無教蓋就外傳以後則

其所學者屬於師友而不繫于父兄之家教矣

女子十年

也十歲

不出

不出外門也女師

教婉

謂言語柔順

婉

謂容貌柔

順

聽從

以順為正

執麻杲

謂績紡

治絲繭

謂蠶事

織

紡織

紵

繒帛

組紃

皆是縑薄間者為組似繩者為紃

學女事以共衣服觀於祭祀納酒漿

籩

竹器

豆

木器

菹

菜茹

醯

肉醬

禮相助奠

以禮相長者而助其饋奠

輔廣曰婉有委曲之意婉有遲緩之意聽從所謂以順為正也婦人之德莫此為盛始於容德中於女工之事終於祭祀之禮婦人之事盡是矣

方慤曰不出謂常居閨閣之內也聽則有所受從則無所違皆女德也執麻枲則績事也治絲繭則蠶事也觀於祭祀則欲其習熟是事故也非特觀之而已又且納酒漿籩豆菹醢等物以致其禮相助長者奠之於神焉

吳澂曰籩豆菹醢者籩豆其菹醢謂以菹實實于籩豆也納其酒漿于尊壺實其菹醢于籩豆各有司之者使女子觀之至行禮之時則相長者而助其奠於

神位之前也

臣按此內則言教女之法

曲禮曰幼子常視毋誑

誑欺

童子不衣裘裳立必正方

不可

斜向

不傾聽

不得傾頭側聽

長者與之提攜則兩手奉長者之手

負劍

童子長若旁若負劍然

辟

偏也

呬

口旁

詔之

謂傾頭與語

則掩口而對

劉彝曰幼子之性純明自天未有外物生其好惡者

無所學而不可成也如金之在鎔惟人所範如泥之

在鈞惟人所模故視之以誠信則誠信篤於其心矣

視之以詐偽則詐偽篤於其心矣模範之初貴得其
正則五事之用無不出於誠而適於道也故曰幼子
常視母誑

戴溪曰常視母誑所以養其心也不衣裘裳所以養
其體也蓋不開其情偽之端以育其正性不傷其陰
陽之和以長其壽命此古之成人所以多有德也夫
內外交相養也防其外所以養其中立必正方不傾
聽則敬以直內而無傾邪之態矣

馬晞孟曰就而攜之則捧其手近而詔之則掩其口而對者皆事長之禮也古之成人有德小子有造者豈一朝一夕之習哉自幼穉而已知夫禮讓矣少而習之壯而行之老而安之古人年彌高而德彌邵者蓋出於此也

王藻曰童子不裘不帛不屨絢

鄭氏曰裘帛溫傷壯氣也絢屨頭飾也

臣按此古人人家教童子之禮夫古人有胎教方

其妊子之時必謹所感心感于物則其子形音肖之故有胎教之禮傳所謂胎教者寢不側坐不邊立不蹕

即跛也

不食邪味割不正不食席不正不坐

目不視邪色耳不聽淫聲夜則令瞽誦詩道正事如此則生子形容端正才過人矣古人為教方其子在胞胎之中已謹其所感及其子在孩提之日尤謹其所示稟之于初者純全而無偽養之於幼者端正而無邪所見必正事所聞必正聲所視必

正色所言必正理非但男有教而女亦有教非但養其心而又養其身古之人家其豫于教者如此是以他日出而就教于學校服役于官府執事于朝廷無所往而不可古之時人無不成之才官無或廢之職事無不就之功者由此道也非獨男子為然而凡人家之女子在家者無不孝持已者無不貞為人妻則順為人母則慈上至宮闈下至閭巷若貴若賤曰男曰女人人皆有教家家皆有法

而天下之平由此其基也

春秋穀梁傳曰子既生不免乎水火母之罪也羈貫成童不就師傅父之罪也

范甯曰羈貫謂交午剪髮為飾成童謂八歲以上

張載曰教小兒先要安詳恭敬今世學不講男女從幼便驕惰壞了到長益凶狠只為未嘗為子弟之事則于其親已有物我不肯屈下病根常在又隨所居而長至死只依舊為人子則不能安洒掃應對接朋

友則不能下朋友有官長則不能下官長為宰相則不能下天下之賢甚則至于徇私意義理都喪也只為病根不去隨所居所接而長

臣按書曰若生子罔不在厥初生禮曰禁于未發之謂豫朱熹亦謂子之初生不可不慎其初所教所謂慎初所教即是豫教於未發之初也蓋以人之初生童孺之時元氣未漓天真未散善性未斲情實未開當此時而開導之則順而易過此時而

防閑之則逆而難張載所謂今世學不講男女從
幼便驕情壞了驕情二字其病根也臣故輯古人
教童子之言以示天下後世使有家者知至要莫
如教子必豫教於童稚之初有國者知大本在於
齊家必致謹於家鄉之禮如此非獨可以除去士
庶之病根而人君治平之善根亦於是乎萌蘖矣

以上人家教
童子之禮

曲禮曰男子二十冠而字

內則曰男子二十冠始學禮

士冠禮曰筮于廟門

福廟也

主人戒賓乃宿賓

宿以進之

厥明

謂宿賓之明日

夕為期

為加冠之期

于廟門之外夙興

起早設洗

承棄水之

器

直于東榮

屋翼也

陳服于房中西墉

墉也

下東領北上主

人玄端

士入廟之服

爵韞

蔽膝也

立于阼階

東階

下擯者玄端負

負之北面

東塾將冠者采衣

童子之服

紒

結髮

在房中南面賓如主

人服贊者玄端從之立于外門之外主人迎出門左西

面再拜賓荅拜主人揖贊者與賓揖先入每曲揖至于

廟門揖入三揖至于階三讓主人升立于序端西面賓

西序東面贊者盥于洗西升立于房中西面南上將冠

者出房南面賓揖將冠者將冠者即筵坐贊者坐也跪櫛

梳也設纚鞞髮之具賓降盥卒升賓筵前坐也跪正纚興降階一

等執冠者冠緇布升一等東面授賓賓右手執項冠之左

手執前冠之前進容行而為容儀乃祝祝始加之辭坐跪如初乃冠

乃加冠于首興復位冠者興賓揖之適房

始加祝曰令月吉日始加元服棄爾幼志順爾成德

壽考維祺介爾景福

冠者服玄端爵韠出房南面賓揖之即筵坐跪賓盥正

纚如初降二等受皮弁右執項左執前進祝加之如初
興賓揖之適房

再加祝曰吉日令辰乃申爾服敬爾威儀淑慎爾德
眉壽萬年永受胡遐福

冠者服素積素韠容儀也出房南面賓降三等受爵弁加

之服纁裳韎韐其他如皮弁之儀

三加祝曰以歲之正以月之令咸加爾服兄弟具在
以成厥德黃耆無疆受天之慶

筵于戶西南面賓揖冠者就筵賓受醴于戶東加柶

七之

屬面枋

柄

筵前北面冠者筵西拜受觶賓東面荅拜薦

脯醢冠者即筵坐

跪

左執觶右祭脯醢以柶祭醢三興

筵末坐啐醴興降筵坐奠觶拜執觶興賓荅拜

醴辭曰甘醴惟厚嘉薦令芳拜受祭之以定爾祥承
天之休壽考不忘

賓降直西序東面主人降復初位冠者立于西階東南

面賓字之冠者對

應也

字辭曰禮儀既備令月吉日昭告爾字爰字孔嘉髦

士攸宜宜之于假

也

永受保之曰伯某甫

伯叔季惟其所當

臣按此古儀禮士冠禮也宋儒朱熹嘗即此儀以

為家禮臣已櫟括以為儀節具見本書茲不詳載

郊特牲曰適子冠於阼以著代也醺於客位加有成也

三加彌尊喻其志也冠而字之敬其名也

冠義曰已冠而字之成人

之道也

陳澔曰著代顯其為主人之次也酌而無酬酢曰醺
客位在戶牖之間加禮於有成之人也三加始加緇
布冠次加皮弁又次加爵弁也喻其志者使其知廣
充志意以稱尊服也此適子之禮若庶子則冠于房
戶外南面醺亦戶外也

臣按古禮三加始加緇布緇布之粗不若皮弁之
精再加皮弁皮弁之質不若爵弁之文愈加而愈

尊後世拘於時服非若古人可以上下通用行禮者因時制宜不必盡拘可也

冠義曰古者冠禮筮日筮賓所以敬冠事敬冠事所以重禮重禮所以為國本也

葉夢得曰所以為國本者何也蓋冠而成之則責其為子將至於為父子則有臣道也父則有君道也為國之本莫大於是

臣按後世筮法不全而為賓之人難得惟擇而用

之可也

見於母母拜之見於兄弟兄弟拜之成人而與為禮也
臣按司馬氏謂此禮今難行但於拜時母起立可
也

成人之者將責成人禮焉也責成人禮焉者將責為人
子為人弟為人臣為人少者之禮行焉將責四者之行
於人其禮可不重與

呂大臨曰所謂成人者非謂四體膚革異于童稚也

必知人倫之備焉親親貴貴長長不失其序之謂備
此所以為人子為人弟為人臣為人少之禮行孝弟
忠順之行立也

冠者禮之始也嘉事之重者也是故古者重冠重冠故
行之于廟

臣按司馬氏謂今人少家廟但冠於外廳筭於中
堂可也

家語孟懿子曰始冠必加緇布之冠何也孔子曰示不

忘古也

臣按程氏言今行冠禮若制古服而冠冠了又不
常服却是偽也必須用今時之服夫古禮始加緇
布冠冠畢而敝之亦是常時不用之服豈是偽哉
今家禮始加深衣幅巾亦是不忘古之意

司馬光曰古者二十而冠所以責成人之禮蓋將責為
人子為人弟為人臣為人少者之行于其人故其禮不
可以不重也近世以來人情輕薄過十歲而總角者少

矣彼責以四者之行豈知之哉徃徃自幼至長愚騃若一由不知成人之道故也今自十五以上俟其能通孝經論語粗知禮義然後冠之其亦可也

臣按此人家男子加冠之禮

曲禮曰女子許嫁笄而字

內則曰十有五年而笄

雜記曰女雖未許嫁年二十而笄禮也嬪人執其禮燕則髻首

孔穎達曰燕則鬟首者謂既笄之後尋常在家燕居則復去笄而分髮為髻紛也此為未許嫁故雖已笄猶為少者處之

賀瑒曰十五許嫁而笄則主婦及女賓為笄禮主婦為之著笄而女賓以醴禮之也未許而笄則婦人禮之無女賓不備禮也

臣按此人家女子加笄之禮詳見朱氏家禮有女笄者按而行之

以上人家冠笄之禮

詩序曰標有梅男女及時也召南之國被文王之化男女得以及時也

陳傅良曰男女及時之說聖人之慮天下也血氣既壯難盡自檢情竇既開奚顧禮義故昏欲及時者所以全節行于未破之日學欲及時者所以全智慮于未分之時

曲禮曰男女非有行媒

謂媒氏往來

不相知名

謂男女之名

非受

幣不交

交接

不親

親近

故日月以告君齋戒以告鬼神為酒

食以召鄉黨僚友以厚其別也取妻不取同姓故買妾不知其姓則卜之

鄭氏曰見媒往來傳昏姻之言乃相知姓名重別有禮乃相纏固

戴溪曰上以告之人君幽以告諸鬼神明以質諸鄉黨親戚上下幽明咸與聞之禮莫重于有別知之者衆則其別厚矣

內則曰男子三十而有室女子二十而嫁有故二十三

年而嫁聘則為妻奔則為妾

方慤曰嫁止於二十娶必止於三十者陰以少為美
陽以壯為強故也聘言由此而問彼奔亦自此而趨
彼

昏義曰昏禮者將合二姓之好上以事宗廟而下以繼

後世也是以昏禮納采

納鴈以為采擇之禮

問名

問女之生母名氏

納吉

得吉卜而納之納徵

又為之納幣者納幣以為昏姻之證也

請期

昏姻日期

皆主人筵

几于廟而拜迎于門外入揖讓而升聽命于廟所以敬

慎重正昏禮也

吳澂曰昏禮先有行言之媒女家許乃納采謂男家納禮聽女家采擇擇而可乃問女名將以女之名歸而卜其吉與否卜而吉乃報女家曰納吉納吉後納幣而女家受之自此乃請期親迎而成昏也

臣按古語云六禮不備貞女不行古人所以敬慎重正于昏禮如此敬則不敢慎則不忽重則必致其隆正則不流于僻所以然者蓋欲以之上奉宗

廟下繼後世然亦使其知夫嬭之倫乃綱常之大
道男不敢忽其嬭女不敢狎其夫必相與偕老而
不輕相背棄也

周禮大司徒以十有二荒政聚萬民十曰多昏

劉彝曰夫嬭之禮雖不可不謹于始然民有細微貧
弱者或困于凶荒必待禮而後昏則男女之失時者
多無室家之養聖人傷之寧邦典之或違而不忍失
其昏嫁之時也故有荒政多昏之禮所以使之相依

以為生而又有以育人民也詩不云乎豈弟君子民
之父母苟無子育兆庶之心其能若此哉此則周禮
之意也

媒氏掌萬民之判

因其別而合之

凡男女自成名以上皆書年

月日名焉令男三十而娶女二十而嫁凡嫁子娶妻入
幣純帛無過五兩

丘葵曰昏姻欲致一故用純色之帛五兩十端也富
者無過貧者亦可以及禮之中制也

臣按成周之世嫁子娶妻純帛無過五兩謂之無過者禁止之辭也蓋慮世之人有以奢侈而踰度者故為之中制如此近世民情浮薄昏娶之際往往論財羔酒之外索取銀錢謂之財禮乃至民間聘定動踰數年而不能備數以至昏姻失時者往往有之朝廷明有定制有司不能舉行宜時申明之使男女之昏嫁各得其時是亦蕃民生厚風俗之一端也

穀梁傳曰禮送女父不下堂母不出祭門廟兄弟不出

闕門

兩觀

父戒之曰謹慎從爾舅之言母戒之曰謹慎從

爾姑之言諸母般

囊也盛物以備舅姑之用

申之曰謹慎從爾父母

之言

臣按女婦以順從為德故女子之嫁人父母醮之必欲其從舅姑之言至其諸母不復有戒言惟丁寧致祝欲其從父母之言而已夫古昔盛時女子在家父母既隨時因事而教戒之矣及其適人也

則又申戒之焉是以閨門雍穆而家道以成教之有素然也

漢王吉上疏曰夫婦人倫大綱夫壽之萌也世俗昏娶太蚤未知為人父母之道而有子是以教化不明而多夭

司馬光曰世俗好于襁褓童幼之時輕許為昏亦有指腹為昏者及其既長或不肖無賴或身有惡疾或家貧凍餒或喪服相仍或從宦遠方遂至棄信負約

速獄致訟者多矣

臣按司馬光此言非但昏娶不可太蚤而聘定亦不可太蚤朝廷宜定為中制以為禁令是亦可以厚風俗息爭訟

匡衡曰妃匹之際生民之始萬福之原昏姻之禮正然後品物遂而天命全

司馬光曰古者男子三十而娶女子二十而嫁今令

文

謂宋朝
禁令

男子年十三以上並聽昏嫁今為此說所

以參古今之道酌禮令之中順天地之理合人情之
宜

臣按醫經女子二七而天癸至任脉通男子二八
而天癸至精氣溢宋朝令文男子十三以上並聽
昏嫁臣竊以為十三亦為太早宜定制男女十歲
以上方許聘定男必十六女必十四方許嫁娶而
男女之年齒亦必略相當男可長于女女不可過
長于男自昔浙東有溺女之風男子往往三四十

歲而無妻甚有終身不識女子者遇有嫠居聚徒
爭奪告訐成風多致破家川蜀民風男僅數齡即
娶倍長之女此皆風俗之不雅者諸如此類皆宜
行禁革非獨可止爭訟是乃厚人倫美風化而亦
可以蕃生育之性絕淫泆之端

以上人家
昏娶之禮

左傳桓公十八年公與姜氏如齊申繻曰女有家男有
室無相瀆也謂之有禮易此必敗

呂大圭曰古人制禮尺寸不敢踰毫釐不敢越者夫

豈強拂人之性情而以繁文末節為尚哉經國家定禍亂而杜未然也泉水載衛女思歸而不可得載馳許穆夫人欲歸唁其兄而義不可夫人之適其國父母在則有歸寧既終則大夫行聘問而已古人制禮也嚴矣違此未有不敗

莊公二十七年冬杞伯姬來歸寧也凡諸侯之女歸寧

曰來出

為夫所出

曰來歸

孔穎達曰歸寧者女子既嫁有時來歸問父母之寧

否父母沒則使卿歸問兄弟也嫁謂之歸而寧謂之來見絕而出則以來歸為辭來而不反也

穀梁禮婦人謂嫁曰歸反曰來歸

明從外至反謂夫家所遣

臣按女子于父母家乃其生身之地根本所自出固不可不歸寧但父母已沒則不可爾然于其兄弟嫂姪之間烏可忽然無情哉室適則朝去夕歸道遠則遣人問遺是亦禮之近人情者也

詩序泉水衛女思歸也嫁于諸侯父母終思歸寧而不

得故作是詩以自見也曰寔彼泉水亦流于淇有懷于衛靡日不思嬖彼諸姬聊與之謀

朱熹曰衛女嫁于諸侯父母終思歸寧而不得故作此詩言寔然之泉水亦流于淇矣我之有懷于衛則亦無日而不思矣是以即諸姬而謀為歸衛之計也朱善曰禮緣人情而為之也夫既曰緣人情而為之則父母其本根也兄弟其同氣也皆人情之不可忘者而何為不可以寧兄弟也曰人情有出于天理之

公者有出于人欲之私者聖人制禮將以全夫天理之正而節其人欲之流也據禮女子已嫁而反兄弟不與同席而坐不與同器而食所以厚別也則閨門之內所可與同坐而共食者惟母姑姊妹耳使父母沒而歸寧則誰與同坐誰與共食而孰為之主乎聖人于此寧以義斷恩不以恩揜義故制為父母終不得歸寧之禮所以存天理而遏人欲也以此為防猶有禽獸其行如齊襄魯桓夫人之所為者然後知聖


人制禮真可謂萬世無弊者矣

臣按女子嫁而歸寧古有是禮然父母終而無姑姊妹在室者不可也若有寡嫂及其人之年五十以上者揆之于人情似亦無害

以上女子歸寧之禮

以上家鄉之禮上之中

大學衍義補卷五十



覆校官編修臣張秉愚

校對官檢討臣王福清

謄錄監生臣朱烺